



秋水集卷第五 詩五

又北

滿目烽烟送夕紅
尊前霜色醉江楓
離歌抵死催人別
故友頻招不我同
一病深閨愁夜雨
十年長缺哭秋風
從今萬里雲羅闊
莫爲無書怨朔鴻

二

容易清霜上鬢華
片帆今又滯天涯
西風砧杵催寒節
南國旌旗卷暮霞
多見戍樓飛白雁
偶逢商舶載黃花
支機不作星津夢
自笑頻隨八月槎



三

風塵塊莽北山羅
 白草黃沙落日多
 已道不如歸去好
 祇應無奈寸心何
 平生欲付漁陽摻
 感激曾吞易水波
 何日青鞵生事畢
 草堂風雨一漁蓑

四

紅亭柳色醉中攀
 但計征程不計還
 宛轉行藏心迹外
 艱難消息是非間
 貧寧私我偏傷骨
 熱偶因人亦厚顏
 去去殷生休意氣
 書郵珍重報江關

五

千金吾愧戒垂堂
 日日風波厭路長
 夢裏吳歛愁鼓柁
 病來魯酒畏盈觴
 時看野渡停紅粉
 盡檄官航貯綠楊

時以糧艘運柳塞河

北客不知回首恨
 苦將魚米

問江鄉

六

危檣獨夜此浮生
 何處偏增望古情
 吳季遺風懸劍壠
 魯連高節射書城
 白楊不落吟風葉
 画角頻吹向月聲
 一水分流千古在
 唯教二子暫成名

明月三五篇

誰懸明月照金臺一片無情又上來
潛度九衢添照灼似臨雙闕更徘徊
嚴城箴策東風裏朱邸曾無一
關啟油壁停飛金犢塵銅壺淺瀉銀虬水
鳳蹕歸來太液春蛟冰初解小平津
誰知蛤帳流蘇月不照昭陽第一人
昭陽月色傷心白況復軍書正充斥
赤羽朝翻雲夢波青烽夜燭袞斜石
此時相望不勝愁處處清光滿戍樓
無復玉臺羞鏡影可憐紅粉泣刀頭
江南江北明如練鐵鎖曾經鎖天塹
已報金戈昔昔來何論玉樹朝朝見
卽今愁殺下江兵驚起烏栖怨月明
瓜步羅旗紛滿目蘭陵玉笛暗收聲
上陽月落悲歌起又向淄塵老游
子白頭官監憶昇平繫馬重街話
燈市燈市斜暉接寶坊珠樓簾幙盡
焚香千金羹鼎誰論價百戲魚龍早
擅場青蛾皓齒森成列墜珥遺簪誰
更惜十里梅風送日成春心總向嬌
郎擲五劇三條響玉珂金吾安問夜
如何黃柑乍接通侯宴紅豆偷傳戚
里歌月地雲堦都似許五枝青玉飛
成雨憑君莫更說開元客帳春寒夢
江渚

懷留仙

空江木落秋氣悲金山寺中携手時頽波東馳日
西去使我寸心無所施山樓呼酒不盡筭與君忽
別金山下祇言明發終各天及行悔不同今夜江
帆一葉去如矢不見情親見江水平生此別最沾
巾我北君南五千里惜君棲遲亦已久時危轉作
踈踈走憐君大笑方出門橫槩飛書將報恩吁嗟
帶甲滿天地人生意氣安可論玉堂舊事青綾被
貧負官家起凡例不妨暇日坐銷憂但許登樓富

清製衡陽歸雁武昌魚昨得惠連新附書已慰還
愁心轉惑兩鄉萬事終何如恒齋闌前梅花白花
開幾日吹作雪此中樂事何茫然愁殺金臺欲歸
客欲歸不歸春沉沉天涯孤月懸我心紫桐詩好
寄未達何況夢去瀟湘深瀟湘回識江南路江水
湛湛青楓樹歸來與子長相依鏟卻金山別離處

寒食

南中百五日雜樹花如霰輕蕘千里秀游絲百尋
冑白日麗重湖遙峰隱可見鶯憐急管哀蝶喜新

妝袷迴汀隱歸橈芳草籍遺鈿遊子久京邑離居
老親申執蘭未招魂結柳傷幽眷援琴南音歇馳
飈薄窮舊况睇雲端鴻因悲春物變

雜詩

山長杏花落悵望息心侶終然倦幽尋空簾夢紅
雨窗西移根柳踈地猶金縷朝來靜婉腰摧頽不
堪舞客心共茫茫春風不我與長恐馳光謝奈此
羈晨苦動止乃循墻誰知中齟齬物情所相矜睨
之忽如土豈無獨抱心脈脈安可語

葉訥菴司成邀飲花下作

北地多丁香高者覆檐牖繁艷簇柔枝春風開已
久昨日復狂飈黃霧暗林藪颯沓摧長松離礎折
高柳殘花數枝在憔悴空復有下有憂時人慷慨
爲置酒不復遲車馬依依命賓友何事羅圓方唯
應剪春韭旅人困周防三爵耳熱後獨覺此夕間
得自謀心口夫子執高節與世亦難偶高詠北風
篇飲罷重搔首

柳枝

拂水拖烟已不禁誰堪繫馬鳳城陰東風一報三
眠後十二玉樓深更深

二

不分靈和復永豐最無情思月明中綠窗人去東
風急獨向間堦掃落紅

三

莫到燕臺又詠詩長條空解緒相思一池風約湔
裙水腸斷雙鬟抱立時

四

雷塘南下最紛紛画得長眉亦是君一自錦帆零
落後春風何處不離羣

五

爲有離愁不自聊落花微雨罷吹簫紅泥亭外鶯
聲裏數遍輕帆第幾橋

六

休攀金縷惜殘春憔悴紅橋舊病身記得蘭舟回
首望綠陰陰下倚樓人

七

亂絲飛絮送人天莫爲閒愁損少年人世無情誰
更似章臺微雨灞陵烟

八

不知情緒爲誰多立盡殘陽與逝波江左風流非
舊日漢南春色奈君何

九

十里清陰接翠微瑣窗新月上簾衣夜來燕子分
明訴遮斷紅樓不放歸

十

曲闌深院護天斜不遣流鶯報早衙道蘊別來誰
解惜年年風雪在天涯

劉富川詩

冥冥氛祲暗連營試問蒼梧尙幾城但使當時遲
一死更將何地置先生尋常孝子忠臣事寂寞千
秋萬古情唯有富川川上水東流猶自爲君清

寓楞嚴寺

一洗風塵眼禪關向水開細蟬號曲徑深竹隱輕
雷飄泊慚燈影興亡問劫灰語兒溪畔月千載共

裴徊

吳山道院

夢裏仙城十二樓
榻來風景使人愁
金牛草蔓繁華歇
鐵弩江空日夜流
鐘寂始知山月晚
笛高初入海風秋
烽烟甞隔清都境
爲報遊人正倦遊

集茂承堂

獨餘朋舊慰淹留
硯北相尋愜冥搜
塵尾論文清酒滿
桂叢招隱碧湖秋
天涯風雨存知己
亂裏山川似昔游
添得平生惆悵處
武陵門外夾城頭

分賦二十四番花信得杏花風限韻

冥濛香霧稍經旬
染得檀霞著樹新
兼曉不醒珊枕夢
辟寒全放瑣窗春
輕帘縈舞才當路
弱燕欹斜解趁人
紅粉墻頭愁日晚
莫同吹萬起青蘋

題陸蓋思繞屋梅花圖

我來孤山尋處士
澄湖冷落梅花死
世無其人不足言
望古長吟意何已
忽然披圖驚見之
雪花萬樹移於斯
聳身葢珠落玄圃
此中合與仙人期
平原才思大如海
飛揚意氣應猶在
風塵鹵莽半扶

搖胡獨空林臥魄礪十載論心過武林巡檐一笑
許相尋北鄰況有王丹麓占斷長松百尺陰

送吳伯成明府按察福建

泠泠湖上風浼浼溪邊水非復昔時情長亭向千
里城西楊柳綠紛紛攀枝折條送使君使君去矣
承主恩承主恩不遑息莫攀公轅臥公轍閩
海長鯨始自歸撫綏旦莫須才急秉持重典邦禁
尊秋荼密網非皇仁張弛有道在所寄中世循格
無其人公名久在御屏上帝曰汝諧唯汝往

一朝拜手卷黃麻拂拭鳴琴斂餘響仙鳧起彩鷁
翔碧油紅旆照河陽雒州大郡色如土昨或比肩
今負弩人言服官樂豈知服官苦槁項望一調惴
惴保尺組望公不啻昇天行下視蒼蒼那堪數公
昔撫我來民愚但言莫公今舍我去乃不須更住
回顧望我鄉棠陰覆屋桑柘長便令他日復觀止
堂高簾遠私自傷私自傷田夫及紅女何況從公
刻燭游十載心期共風雨何用持自慰一人知己
可無愾何用持祝公凌烟劔珮丹青雒僊霞關日

飛春風三年苦見旌旗紅荔支甘蔗亦已空公行
勞苦惠飛鴻無諸舊邦有先澤天風海濤相與垂
無窮

和顧麟士先生與嗣君伊人唱和織簾居
詩次原韻兼題遺照

滄海橫流後先生早閉關約身歸白社蓄眼看青
山事去遺經在庭虛問字閒祇應簾外月曾照画
中顏

續和唐人惠山詩次原韻

唐貞元中王晦伯竇丹列朱遐景三賢唱惠山
詩晦伯爲序書於寺中元和初丹列再題俯仰
有差池之痛其後寺歷成毀而丹列甥李蘧復
追錄前作至宋蘇子瞻秦太虛而下洎於今人
代有和者秋日列觀諸詩與二三同游各繼其
後雖古今興感略同一致至於所遇則萬有不
齊覽者亦可以慨也

次王武陵

百代何遷斥九龍宛蒼蒼矯首餐霞人茲焉卽金

秘九集 卷五 仙亭
堂諸子復登臨文藻紛翺翺節物委朝彩林巒生
夕光遠見今古列靜聞草木香平生飲清泉中心
安敢忘

次竇羣

霜葉吟秋士風花集春人歸慮歛已故來感方爲
新晴川媚玄崖石瀨清粼粼背郭聞幽吹向山樓
暗塵深尊動落日衽服羅青旻誰識巖居者寥寥
無與鄰

次朱宿

鬱紆青蓮界巖扉閔林樾清景昔再遇零落心已
絕況我平生情及茲坐微滅石門亦何事尙吐南
朝月雲秋樹影閒澗暝鐘聲發喧寂豈無時委花
觀一轍

作酒

須爾扶衰颯開缸不待賒時時候寒燠短短注鉛
華聽合蟠空雨嘗催上臉霞由來亡國物宜在野
人家

北征馬上作

藤鞵席帽走跋跋物換星移倍損神朱果何心垂
驛路青蠅抵死傍車塵雲迷齊魯亡來國雨打江
湖倦後身為送蒲輪趨 詔客一時袞袞上雲津

二

斷虹低處暫停鞭綴石編荆土俗便千樹濃陰輪
井稅一犁新雨種山田岱宗昔別計不返京國重
游心惘然亦有茅齋容跂腳桃笙拋斷綠窗前

三

炎風吹雨白楊枝襍穢衝泥去較遲野麥作糜供
壓酒山桑成繭趣繰絲他鄉且喜差安日此路曾
無暫息時江雁同歸黃葉下玉堂鈴索寄相思

四

幾經循髮走天涯貪看烟嵐路不賒馬過清溪流
正急蟬鳴深樹日難斜宿瘤村媪工炊餅槁項山
僧苦施茶忽憶柳塘歸櫂晚綠瓷新水載荷花

五

絮衣蒙暑笑浮生敢爲長塗事倒行芳草斜陽俱
困懶白雲青壁太分明身乖進退名何有心許知

和方集 卷五
交跡始輕卻望皇州雖信美五噫歌罷不勝情

角聲

曉角聲何壯咿咿喚客愁彎弓羽林子駐馬早驚
秋送月沈榆塞因風度鳳樓城烏鳴卻避多恐白
君頭

砧聲

消息征西士秋閨尚擣衣月明聽不得恐有淚俱
飛心手一相亂聲情兩不歸罷時餘落木相送入
羅幃

寓千佛寺贈蒼上人

浪迹仍京國蒼公早閉關昨來移襪被正得傍高
閑綠竹已遮戶白雲常在山肯飛霞外錫期我赤
城間

重苔蒼公用前韻

謂余猶可語清句啓玄關幻跡本何有浮名終未
閒黑灰然後劫紅葉夢餘山栢子窗前落難孤此
夕間

題画菊

秋九集 卷五
作底駐年芳禽華早著霜紛披何限葉點注好秋
光月避移燈影風傳安鬢香繞籬看不足圖取寄
柴桑

萬柳堂柳枝詞爲馮易菴相國賦

丹禁城南小苑開萬株新柳拂烟栽相公論道歸
常晚能踏沙堤幾度來

二

問訊平泉金縷枝陌頭飛絮可同時移根獨近金
莖露不向春風管別離

三

軟紅衝過六街塵剪綠搓黃別作春糝徑會憐花
似雪不能更要掃門人

四

雨滋烟斂綠成行小小紅亭曲曲塘應待相公脩
禊飲拂開萍葉送流觴

五

便須長共月嬋娟占得星精本在天歷歷白榆誰
似爾直分光影上台邊

六
薰風瞻柳遍春城可似章臺走馬情共指平津開
閣地莫教錯認亞夫營

七
柳浪萍池自不局黃鸝啼處綠冥冥長安冠蓋渾
無暇幾箇雙柑樹底聽

八
踏青挑菜卻來無譜出清明士女圖最想攀條人
散後一庭涼月夜啼烏

九
太平橋畔最絀絀早許遊人策杖探但傍上林眠
起穩不妨搖落有江潭

十
年年三月鬪芳菲雨露常沾在紫微不管淄川千
萬樹盡舒青眼望公歸

偶題

青粉牆頭柳尚稀一彎新月暈初肥昏鴉不待離
人夢卵色天南夜夜歸

送邵芾南南還

相樂復相泣天涯失意歸青門折楊柳鄉思轉稀
微子去何欣戚余畱果是非臨岐還借問曾否製
春衣

題徐電發楓江漁父圖

瑟瑟波中一櫂迴鳧雛相趁小鷺猜等閒莫道垂
竿手消得珊瑚架筆來

二

才名已是九重聞豈有閒身屬水雲我去垂虹亭

畔路碧湖紅樹卻思君

題西海棠

春風垂手乍嫣然何處看來最可憐記起綠窗簾
捲上曲欄干外小山前

喜雨記事

五土方典事三農本告祥舞雩傳月令歌漢凜天
章稍稍焦榆莢遲遲秀麥芒不成田畷喜真笑道
傍穰 睿慮存無逸殷憂視若傷蒼黃分釜豆浩
蕩及桁楊故事勞崇社無辜怪暴尪 九重初撤

樂五夜獨焚香玉趾移神甸金根罷寶坊燔柴嚴
具禮羽翳肅成行漏轉雲開席壇深月照墻烟霏
旋霖霖風急忽飄揚暗失山川繞陰連劔珮涼不
知沾袞繡直喜散珪璋去浥雞翹遠來迷豹尾長
沿洄緣禁籞傾瀉卽林塘柳岸纔維艇花村半決
防終朝聽布穀昨夜舞商羊已辨撈蝦笠從看壓
酒牀歸與安作息 帝力亦相忘

淶水亭觀荷次西溟韻

久識林塘好新亭愜所期花低隨燕掠波動見魚
吹涼氣全侵席輕陰尚覆池茶瓜留客慣行坐總
相宜

二

遠見廉纖雨都隨斷續雲漬花當徑合添漲過城
分樹杪驚殘角鷗邊逗夕曛漁歌疑可卽此外欲
何聞

三

宮雲溼更浮清漏接章溝抗館烟中遠疏泉天上
流銀鞍臨水映金彈隔林收多謝門前客風塵刺

漫投

四

碧瓦壓堤斜居人半賣花
卻思湖上女並舫折殘
霞蘸綠安帆幅寒紅卷袖紗
空留薜蘿月應識舊
漁家

又成絕句

醉向前除眼倍明疎簾青
簟坐縱橫只看葉葉風
翻去不辨荷聲更雨聲

二

懶甚稽生得所知每逢清景不勝忌
何年吹笛橫塘晚憶著觚稜雨暗時

送張見陽赴江華令

每向風塵際識君山水情
一尊松下酒涼月記平生
束帶忽言別專城方此行
臨岐重惆悵爍石是
王程

題元人梧鳳圖

丹穴生何代文明信在躬
秦臺仙史外漢紀瑞圖
中影正扶桑日聲隨弱水風
九千時上擊還集帝

詩

十八

梧東

柘溪圖詩為喬石林賦

柱史抽簪返白田
釣魚磯畔載書船
禍成北寺身先退
事去南朝臥獨堅
薇省文章留奕世
柘溪烟水自當年
西莊給事歸應晚
莫誤丹青作輞川

題王山長教授小照

慷慨悲歌地嶽奇
可笑人相逢猶拙宦
所得且閒身一代
才名久二三
湘歸夢春青
瓊尊酒在白髮
函圖新

送劉震修之江寧

籍甚劉公幹
昨來今又行
秋風辭帝里
匹馬石頭城
我厭他鄉別
君兼薄宦情
何時復何地
重對一尊清

秋水集卷五終

秋水集卷第六 詩六

御試省耕詩二十韻

聖治崇邦本 皇情洽豫游
臣鄰歌舊德 草野服先疇
青鳥司開早 蒼龍應律周
蛾眉看柳細 兔目上槐柔
繡錯黃圖遠 烟綿紫禁幽
農祥先事戒 民瘼降心求
八政書無逸 三推典舊修
悠悠移曉蹕 宛宛動宸旂
菖葉長交渚 桃花短照溝
雨師清遠道 風伯引行騶
俗喜吹豳節 人同擊壤謳
公私瞻駐輦 亞旅拜垂旒
隴有依媒雉 墻多喚婦鳩

秋九集 卷六 伊亭
傍烟分社火融雪種來牟僦勉耰鋤力殷勤餉饁
謀碧山生色峙白水載恩流袷服沾紅雨鳴笳下
綠洲 六龍方戒旦九鳳已占秋烽燧消淳化縑
緗入冥搜虞琴一奏罷禹迹按圖收

送李天生同年侍養歸秦中

九衢無歸轍冠蓋若雲烟相逢不相知磬折疲周
旋側聞戒驪駒祖帳青門前惻惻離別悲乃在心
賞間李子抱明義出處何軒然既覽千古蹟肯遺
寸心愆氣貫闐闐風哀哀將母篇疾呼正驚俗

詔書褒其賢高霞自卷舒勁翮起孤騫行事豈必
同要之今魯連余交苦不早執義乃隨肩顧我無
一長彌悲已徂年招提對尊酒中心難盡宣愧爾
既非一敢忘平生言君行安可留解組已我先金
臺折楊柳秋風豈重妍恨恨念前期酒盡長河懸
明發河梁別揮手不能還

爲阮亭前輩題梅耦長函次韻

偶爲披圖憶醉游一關人事漫經秋常年肯負看
山興楓葉紅時不下樓

施愚山侍講索山水小幅題贈

敬亭山下好雲烟借問同歸定幾年已辦青旗紅
樹外一簑涼雨五湖船

送李岷瞻辭景陵歸秦中

秋風陶令賦歸來駐馬重傾九日盃楚澤行吟芳
草歇秦川回首夕陽開由來止水清堪鑑莫作高
雲去不回愁殺蓴鱸江上客日窮鞭影過燕臺

城南春望用留仙前輩起句成篇

連騎城南日欲斜九衢寒盡望天涯推遷歲序青
郊杖邀勒春風紫禁花綵樹轉燈移廟市玉輪簪
勝出侯家烽烟絕塞傳應誤心倦高樓急莫笳

李倚江前輩齋看梅次韻

春風忽已至愁思獨何哉未惜華燈歇仍聞綺席
開巡檐堪共笑秉燭莫遲來冰雪奉君子何求庾
嶺栽

二

移根亦有數流艷復因誰照水疑相妬禁寒忍自
持莫閒浮白手更和比紅詩鬢影彈琴看東風第

幾枝

三

不向花間醉誰從置此身羣公多暇日高唱似前
人且慰風塵眼安知桃李春殷勤重幄護能復幾
芳辰

四

迴燈看素影零亂不禁刪此地又春色空然思故
山置余榮落外期爾醉醒間一樹東窗好衝寒亦
夢還

秋日 賜翰林詹事官太液池藕

宸游采藕上林中 賜出西清拜舞同過闕涼沾
金掌露歸鞍香散玉堂風渴憐華井沉冰白老憶
江潭墜粉紅俱是恩波親洗沐夢魂長繞日華東
詔添 日講起居注官引見 乾清門

講帷清選侍縑緗 紫禁青春引鷺行金掌露晞
隨載筆玉階風過見 垂裳道心更闡千秋蘊文
德新收萬里疆自顧輕塵何所益芟衣慚負惹爐
香

後六日再引見

又傳名字下 彤庭豈有文章照汗青
心託上林同社燕身承 清問傍堦奠
三年漫續龍門史一日難讐虎觀經
羽翼幸多鸞鵠在倘容衰拙付沉
冥

拜 命後作

久爲迂疎憶薜蘿職司清切更如何
百家同異源流遠一德都俞記載多
懵學豈堪叅作述承 恩始自悔蹉跎
筋駑肉緩平生事愁問花輓日影過

上巳日讌集萬柳堂奉和閣師馮易齋先

生韻

勝地經營復幾年疎籬繫馬鳳城偏
平津賓從人咸集曲水池亭世最傳
柳帶結風初試舞杏花成雨尚餘妍
興深應覺沙堤近携得朝回滿袖烟

二

執蘭遺俗事誰偕花氣才蒸已散霾
一夕頓驚歸慮緩三年真得此遊佳
雨開枉渚宜安槩風約繁枝不挂釵
最是調元多暇日平泉觴詠屬吾儕

奉使晉陽道中作

河汾秋色意何如不盡林巒擁傳車早晚人占星
使入古今吾憶霸圖餘雨晴山郭清砧遠風落關
樓西角初借問龍門應接近巖窗恐有舊藏書

貢院中秋

更承綸綍拜垂旒三晉文章入冥搜簾影露寒
收桂子珮聲天遠夢螭頭可無鐵網沉滄海賸有
冰壺濯素秋此夜同袍銜命者一時綦布幾名

州

晉陽歸道雜詩

晨征戒徒御前行已山隩仄徑緣雲根亂流屢濡
足沿洄幾百轉登頓何更僕憶我初北來祇命
心轉促是時秋未半雜花媚巖曲今來但霜華凋
我雙鬢綠自非餐霞遊奈此寒與燠

二

我來山之西蕭槭枯樹林東下忽蒼翠柳色如黃
金數峰隔氣候榮悴不相任未測真宰意何況萬
有心故山籬下菊風霜良未侵君恩亮難酬歸

撫丘中琴

三

駸駸長塗騎所遇乃驚蹇豈惟少良樂生材固已
鮮受命收國士將盡汗血選猶恐隔真才無由
到吾眼龍文喜一得觀者不言善強復加金羈逸
足庶終展唯才與時命自古每多舛賢豪有特達
望古一長緬

四

山右屢告饑皇情深所懷朝蠲今年租莫發司
農廩流冗比來集時稼喜秋稔昇平餘氣象反側
登席衽微臣肅還轅霜風襲欹枕桑落清可沽停
驂更泥飲

五

淮陰破魏來疾下井陘道一走水上軍赤幟遂入
趙幸哉廣武君奇策棄已早不然一言入勝敗懸
縹渺我行日已東未出山徑小荒城一吏迎往事
頗能討當年龍戰地玄黃跡已掃獨立望秋原悠
悠一飛鳥

平滇恭進詩 并序

皇帝臨御歲踰一紀天下乂安兵食強足康衢之歌聞於遠邇中外臣民咸謂已安已治於萬斯年靡有關遺

帝曰不然睠彼西南制閩之臣擁衆虎視勢若鼎足號則宗藩親非肺腑大將不掉蔓乃難圖不有斃勞何以永戢爰

命釋甲歸覲

闕廷將定爾居用衛

王室旣而狼子野心釁成吠主滇池波沸妖氛四應秦蜀抗其門戶閩越樹其唇齒赤羽交馳青烽不斷雖諸葛有五月之渡而王元効一丸之封

天子軫念元元芻茭筐篚不勝供億永唯是役將以息民豈顧讎之於是斟酌便宜罷省徵發旣豫旣立旣儲旣飭然後鳴枹卷甲機駭颺馳西指則平涼之突騎潛奔南擬則仙霞之扼塞不守嶺海洞庭風烟遞掃凡厥叛黨莫不革心務

面銜璧來歸而吳逆身殞天誅猶尚擁竊名號
再世相承黑水白崖偷視假息卒之

天威一震遺孽授首芟夸廓清有同振落康熙二
十年冬十一月捷書奏

聞公卿上壽相與追歎用兵以來迄茲八載向使
晏安痲疾重於一發與待其燎原張皇六師滅
此朝食以重爲民困皆非

陛下之意也今之發縱在心折衝無外使根本之
憂一朝咸拔爰始告成功於

郊廟崇徽號於

兩宮大赦天下與爲更始從此治定制禮功成作樂

三辰合慶萬靈禔祉豈復漢平吳楚唐誅淮蔡
所可同其功德者哉臣以草野蒙

恩備員侍從外之不能援筆幕府効飛書馳檄之
用內之亦未獲登山而頌功以繼七十二代
之編錄情不自已聊成短律斯若厦成燕賀候
至蟲吟猥從諸臣之後仰塵

睿覽臣誠不知懼悚之橫集也

一
昭代當熙洽 天王本聖神
車書山海共 玉帛歲時新
城角軍麾偃 宮花輦路春
兩階千羽日 端拱見皇仁

二

聖治方韜甲 天心未厭兵
賊臣真負主 大將且專征
鷹隼乘風疾 鯨鯢失浪輕
家家春酒熟 從此賀昇平

三

六詔南交地 昆明控百蠻
天連花馬國 山擁碧雞關
雨露知新澤 瘡痍動聖顏
赦書憐父老 扶杖淚痕斑

四

萬里瞿唐峽 天清戰鼓聞
久知蹂躪苦 端恃撫綏勤
波靜珠江水 風開玉壘雲
今朝諭蜀檄 不用長卿文

五

海國驚妖霧 南閩結蜃樓
豺狼方濟惡 猿鶴自同

仇飛檄榕陰暗歸鞍荔子秋水晶宮外路依舊月
如鈞

六

夢澤三湘遠荆門九派長風烟一自失壁壘遂相
望青草湖帆去黃陵社鼓荒版圖終不改拜手頌
無疆

七

隴坂高無際函關百二雄陣開秦嶺北烽舉杜陵
東方略尊 皇極安危倚上公 九重初飲至一

爲奏彤弓

八

老弱愁供億丁男問轉輸敢辭民力困真覺 主
恩殊風勵曾紆綬哀矜又賜租功成歸 廟勝千
古奉黃圖

九

八載宵衣日 宸居忍自高兩楹分虎竹七伐授
龍韜旭日消山瘴天風破海濤萬方耕鑿穩應識
聖躬勞

十

俯仰乾坤大平成覆載寬
紫宸朝萬國青瑣拜
千官 賜酒霞觴重陳詩露掌寒
天顏時有喜
數近 御屏看

送陸翼王歸赴余中丞幕

幕府求名士徵君憶故山
欲持經濟策且趁鶯花
還白日去不已青霞高莫攀
君猶老從事側席未
應閒

上巳日重集萬柳堂次馮閣師韻

春風綠野更尋幽青壁題詩尚可求
細雨輕寒非
舊日落花絲柳似前遊只言勝事難
常得正愧浮
名易滯留且幸年年陪禊飲
隱囊紗帽滿汀洲

二

百年曾此幾流觴一徑清陰護草堂
浮白客來花
滿地踏青人散水平塘宮鶯欲去
憐桃綬壘燕初
歸識杏梁我憶春江好花月不關
風景似瀟湘

題高澹人同年江村垂釣圖

香案前頭出每遲行藏十載不勝思
分明西塞山

邊路流水桃花細雨時

二

愛道紅梨憶較書
柳邊歸院意何如
新恩不阻
濠梁興太液池頭許釣魚

送汪悔齋同年奉使琉球

憶昨元會日玉陛羅四裔
側見中山人遠自重譯
至纏頭尺帛黃拜舞
乃不異其王昔歸化保世
遂及嗣抗表請朝命
天子嘉其義畀之紫泥封
爲擇皇華使鄭重詔九棘
屢集金門議海國遣詞

臣昭代未有例吾聞重溟險
萬里若鳥逝日月互吐納
合散在一氣吹澇見移鯨
山嶽訝易置天琛與水怪
包舉及瑣細行子凌窮髮
脫身信遐厲行坐覘五兩
一失不可紀况聞田橫首
魏闕未旋繫島嶼憤所歷
何年掃氛翳當時語風濤
人盡爰居避汪子軒然來
用舍非所計春卿一顧起
遑復問其次副以薇省郎
明朝入封事九重親試人
由來識名字便宜所陳章
一一經睿思上許扶桑東
永鎮宸章麗下軫風波情
宛轉及廩賜車

服何輝赫公侯良不啻麒麟織成錦寶帶垂綠纒
天仗引華芝蕭笳列橫吹每逢疲馬間覺我神明
弊喧闐青綺門出祖恐無地子行拜嘉慶庶展平
生志稱觴歡父老負弩驅長吏一深捧檄情敢後
叱馭意此邦秉聲教祇事故弗替要使識 皇仁
不共珠厓棄使君挺高標氣與秋旻霽一段生黃
金逡巡敢前致久歷厭人情山川起睚眦何況絕
島間飄飄一秋蒂天生當世才會必有所試所幸
明膏煎無爲多才累共通金閨籍結好踰兄弟風
雨此爲別何當望歸樾差池悲世網哀樂傷中歲
情知萬里行更執臨岐袂西風吹我心逐子去安
稅理我五湖帆相逢始成醉

萬柳堂宴餞馮閣師東歸次韻

問訊平泉萬綠楊莫緣攀折早含霜未應此地真
離席安得如公始故鄉三已流連詩律細十年休
沐 主恩長清陰願駐須臾屐緒論他時作典章

二

從此尊前便得聞清歌教疊莫教刪已無餘事留

天闕猶有封章動 帝顏日觀朱霞行處路國門
紅樹夢中山歸來冷水無窮柳校比青青更幾灣

西苑侍直雜詩

中禁薰風乳燕飛上林新雨石榴肥侍臣記注無
多事一徑清陰下直歸

二

宴罷乾清日正遲百花春隔萬年枝 六龍東幸
三千里歸及蓬瀛避暑時

三

水檻新開十二樓平明珥筆傍 垂旒三年斲隔
龍顏日獨有朱衣鎖院秋

四

璇宮問寢不曾停來往遙山列西屏撤得虹橋西
北面輕帆直到五龍亭

五

自擁青綾夢五湖不知此景在黃圖金昏屋角蘆
花雨添箇烟簑穩稱無

六

太液沿河是玉除荷風香引下來初黃絲繫網朱
橋側上相前頭早得魚

七

觚稜日出引朝叅百疊樓臺鏡一函身似青蓮華
上立雙金龍左玉堦南

八

禱雨郊壇候曉過三時愁入九重多石鯨波暗
荷珠瀉一夜泉聲滿玉河

九

繚垣隔樹見紅泥花徑新開只尺迷歸過池頭頻
立馬諸王猶在水亭西

十

誅蕩天門紅扇開上清冠珮淨無埃常時三事不
俱見望秩名山應未回

十一

漫脫荷裳捧御筵官曹元合近雲烟何當更置
瀛臺令別署獻師領釣船

十二

秘水集 卷六
露寒臺榭俯芳塘面面珠簾護曉涼容易禁林清
讌日車書依舊竹王鄉

十三

離宮新置玉泉山碧瓦參差水殿閒七寶修成端
正月 翠華留幸未曾還

十四

新詔宮門集百僚苑西殘月下迢遙從臣樂觀
天顏喜不待當關趣早朝

十五

前秋曲宴憶承恩坐近紅蘭覆綠尊幾日河汾
銜命去帶將殘醉別金門

十六

紅亭迴鎖白蘋洲禁籞秋晴事事幽特勅中涓携
酒待相公歸日 賜重遊

十七

日長歸院記花甃回憶烟波便渺然白鷺黃鸝忘
帝力伴他人柳日三眠

十八

洗兵何止暢 皇威重譯共
球不自違 頻 賜流
盃亭上宴 瓊裘花外拜
恩歸

十九

折本崇朝費 睿裁乍宜清
簞蔭宮槐殿西一縷
涼颼動又 允詞臣進講來

二十

人間相望卽明河 香案前頭事幾多
臣分敢論温室樹 矢詩聊願託卷阿

送孫編修予立奉使安南

聖人御天統 方輿甲帳每披職
貢圖日南銅柱隔炎海 陪臣載
賚陳丹除表言先臣奉正朔 土宇
幸復東西都 撫承遺緒乞朝命
詔下褒卹矜其孤 皇華使臣慎
選擇輟遣侍從臨長塗 宛陵太
史長七尺 文采落筆光珊瑚
青門柳花白如雨 傾都追送歌
驪駒 賜衣煒煌照虎節 宸翰
彷彿如龍書 昔聞陸生說南粵
橐裝歸報誇里閭 馬卿乘傳論
邛笮 縣令負弩矜前驅 君今事
與古人異 軫念屬國 恩最殊
要令異俗讐威信 功視二子

何區區山村菴羅暗珍果江甸鸚鵡飛神魚龍幄
郊迎拜金冊帶礪其國藩 皇居知君結情在紫
闈衝瘴不肯停車徒使星南歸向北極君登玉階
陳六符

送周渭公禮部 使安南

星使南行敢憚勞春寒初賜繡麟袍千秋白雉來
天闕萬里皇華送客曹驛路詩篇題翡翠故人祖
帳醉蒲萄丈夫四海應如此歸日承 恩有節旄

寄震修

喜甚山公啓明朝見爾名幾人真宦達此席得平
生歷歷文章道依依桑梓情始知稽古力無事與
時爭

二

童稚情親意回思似夢餘頻年京國見相送綠陰
初寒雨西陵權春風璧水居尊絲吾興熟携手事
何如

重陽後三日沈繹堂崔玉階兩前輩招同
同館諸公讌集限燈字

黃花佳約興相仍，猶向秋風滯季鷹。追步曉濡香案筆，懶朝寒憶午門燈。官貧獨有愁呼酒，機息應無熱飲冰。每到高筵貪刻燭，醉看官月下觚稜。

送尤展成同年南歸

送客辭鷓列承恩，憶雁行一看宮月白五負江。
花黃鞭影帶秋雨，城陰歸夕陽。離心與鄉夢，此夕滿吳閭。

題面鶴

悠悠萬里姿，何處飲瑤池。警露元無意，聞天豈自爲。猶應抱清迥，未敢厭喧卑。多謝丹青好，冰霜報所知。

趙玉峰通政金碧園宴集

芳園攬勝鳳城阿，門巷常鳴白玉珂。徑轉有峰疑碣石，花深無路夢牂牁。微霜卷幔吟紅葉，明月開尊醉綠莎。朝罷銀臺歸校早，太平封事正無多。

題函爲王阮亭前輩作

絕嶺何啻萃奔流，逝如斯寧知高深意。猶有變遷時，獨立孤鳥外。渺然青雲姿，若非昇天行。齷齪安

和元日集

卷六

所辭

又題西籬

籬落秋風生事微
疎花片石足因依
不能更向東郊道
纏項紅羅意氣歸

和徐立齋前輩除夕韻

素衣淄後不禁塵
豈爲榮枯患有身
寒似堯年初送臘
律回燕谷幾經辰
朝簪不誤先歸客
歲酒應憐後飲人
昨夜玉堂分帖子
又催新句祝宜春

又和元日韻

珂馬相逢覺眼明
朝元人意未爭名
千門幡勝迎朝日
九陌魚龍待夜晴
病怯餘寒猶恃酒
老憎春物獨宜飭
故鄉門巷東風裏
忍遣笙歌負太平

題王咸中石塢山房冊

西裏堯峰亦故鄉
倘容漁獵借鄰莊
拂衣豈待思芳草
挂席真堪趁夕陽
白石半侵行藥徑
紅泉都近讀書牀
春風最有茅簷燕
猶憶王家舊杏梁

題江村草堂圖留別澹人

苑牆西畔水雲寒
瀑直朝朝駐玉鞍
便憶江村草

和九集 卷六
堂好草堂留與西中看

二

不辭錄別寫青山欲趁秋風幾日還行矣相望更
何許片帆原在有無間

題汪東川同年小照

坐近潺湲白袷寒早無塵事到眉端碧苔紅葉多
情甚莫作秋風世路乘

二

誅茅果否傍山泉便覺披圖境宛然又向五湖添

粉本昨來商略載書船

集朱竹垞同年寓齋送留仙前輩

此夕亦良宴胡然歌路難故人先我去霜月是愁
端別酒那可盡世情真倦看十年徵逐意留夢到
長安

題李分虎小照

京華何意見斯人莫遣丹青點陌塵柳瘦藤枝銘
歲月香爐峰底覓前身

二

泡影流光劇可憐三生指點事依然被他一語還
成縛十五年過更十年

圖刻癸酉字於瘦瓢之上
云有碧山道士約以二十
五年還山中至
是蓋十五年矣

秋水集卷六終

秋水集卷第七 詩七

春日蒙 恩予假南歸

不是 恩深便拂衣涓埃生死報應稀吳牛避熱
先愁喘宋鷁衝風且退飛十載青雲雙鳳闕三春
紅雨一漁磯去來我亦無心者何必從人定是非

二

青鏡寧知白髮催年年珥筆侍蓬萊上林落月垂
鞭入內殿華燈 賜酒回鸞鵠有人聊獨往松楸
無恙好從來寸心敢自孤明義已是身登郭隗臺

三

搏飛端不到青旻高足都看幾要津遮莫吾今先
喪我由來臣少不如人官同王琰貧來久世識稽
康懶是真文酒故交雲雨散夢魂相望落花春

四

因循行計蹇誰留歸到春光澹未休細雨綠江魚
上市暖風紅寺燕隨舟從今只作周南滯何日仍
陪博望游百度螭均行下直昨來惆悵幾回頭

山行

縈迴驛路抱雲根零落朱花尚照村君看定誰粉
本似細皴濃綠趙王孫

道雨

客行疑雨復疑晴俄頃烟雲有變更却在雨中看
雨外隔陂斜日半村明

壑菴

一壑沿洄到宛然青林香冪石堂烟中原投老無
三徑此地經懷已十年剡木作橋通綠杖分池題
榜記紅泉不教靈鷲飛相近蠟屐重判幾度穿

飲酒漫成

端居忽不樂結友事晨征借問行何之無乃歸承
明日予湖海士白首久無成豈不懷深眷置散身
始輕所念逐烏鵲共此南飛情山登梅嶺長水溯
桐江清故人雖在遠許與猶平生何爲臥吳山局
跡俯層城斜窗納湖光欹枕聞江聲此中十日雨
欄柱愁支撐相逢盡薰蕕且幸寡將迎暄涼豈足
懷滯情愧相仍昨始戒江航去去心乃平三老前
致辭願公駐行旌奔湍若走馬胡爲苦遶行數起

循前除望望無時寧昨莫失北渚今朝沒南江東
嶺逗日紅洩雲已晨興我行尚無期回車亦何名
醜酒酌陽侯無爲苦相嬰不見中朝士車馬何崢
嶸傾身託津要安知谷與陵五都盛金穴智足操
奇羸生不歷湍險志氣常自盈不然腰鎌子十畝
躬自耕青村梅雨過香穉羅葵羹官家稅云畢終
年守柴荆嗟我拙行藏茲焉無一能貴賤兩失據
驅馳竟何縈故宜困羈旅坐使百憂并悶來聊自
酌有酒尚如澠因之聽自然乘風委冥冥

雨巾過釣臺

炎靈中斷真人起，詔訪故人思。共理一笑空聞奏，
客星君今乃欲臣。老子故山歸去有羊裘，花裏桐
江碧玉流。釣臺雙峙一千尺，氣貫閭闔排清秋。上
有危亭屹相向，中分細路迴青嶂。斷井殘碑計日
探雲迷，雨送何由上。回瞻突兀酌芳尊，身是先生
幾葉孫。今日風塵渾喪我，漫將身世問乾坤。

阻風

在昔守屯賤，林中鳴素琴。一朝起珥筆，清切冠朝
簪。出入籍，恩眷許身良。自深歸來問生事故，步
不可尋。徑有陶潛菊，裝無陸賈金。盡室失顏色，幽
憂坐盈襟。杖策出門去，庶愜山水心。天地正橫流，
川原愁陸沉。湍險憶所歷，孤舟成滯淫。故山苟可
采，亦足慰行吟。始知處賤易，處貧故難任。短歌心
自失，日落長湖陰。

阻風鄱陽

盡日淹留水一方，百端今又對茫茫。岡頭草帶叢
祠遠，日脚波翻廢壘長。此夜烏飛看滅沒，當年龍

秋水集 卷一 仙亭
戰幾玄黃關河得喪今誰是一片神鴉下夕陽

渡湖

桿索風高相喚開馮夷起舞浪花催不關笳鼓乘
時發誰遣魚龍背日逐忠信豈堪持自許行藏從
此莫相猜人間萬事吾何有歸抱桃笙臥綠苔

詠文石子

犖犖生何代悠悠憶棄捐在多寧自異處賤不成
妍細穎知誰數貞心亦幸全梅黃飛帶雨草綠臥
連天幽契忽相接奇文得共宣晶瑩初解珮彩翠
舊遺鈿金錯周刀蝕砂紋漢鼎鑄氣涵雲葉潤肌
沁土花嫣體孕山山巧曹分箇箇圓翻身辭綠渚
盈手上紅舷洗袂潛生暈沾濡始更鮮終焉蒙採
擇敢自墜周旋行笈從連百郵籤屢破千携來蠻
雨外歸供法雲邊薤簞看承月花瓷養注泉銜奇
空泣楚賞僞欲嗤燕魄礪應難改升沉亦偶然不
須餐髓術聊得共餘年

滕王閣

高樓風景渺無涯朱邳流傳結構賒趣喚鈿箏邀

秋九集 卷一
落日迴開朱箔貯明霞山川昔未歸鴻寶花鳥今
知望翠華曾是文章橫絕地白頭蕭瑟上浮槎

上灘謠

說著灘名也白頭一灘潛接一灘愁勸君莫作南
征客天遣章江向北流

二

灘頭莫聽鷓鴣啼啼苦真愁日易低半日舟行知
未遠數聲猶在竹叢西

三

斥堠堆堆樹綠旗賽神纔罷到來遲三年信有昇
平樂半夜月明人醉時

四

安得南風吹路平不教灘水惱人情天荒地老何
終極瞬息偏勞抵死爭

雨滯南安

朝來且醉眠新水欲平川懶慢人應棄栖遲性所
便江程甘蔗外蠻雨荔支邊笑別主人去長驅問
墮鳶

鷓鴣

繡翎藏處漫呼羣百轉危檣路未分烟渚草荒偏
著我綺窗花落不聞君傳來艷唱兼湘雨喚起鄉
愁入嶺雲懊惱可知歸去好也煩相警最殷勤

度大庾嶺

天開庾嶺分南服根拔虛無削青玉細路髣髴緣
秋毫窮猿夜呼鷹側目石壘寧知天闕迴磴危更
見雲根束天風吹人發橫浦宛轉林光射初旭須
臾纈眼凌蓬萊織女迴車散輕縠始知身在雲中

行徑轉亭開跨長瀑停驂欲問古時梅露實霜花
掃空谷危松何代蟠長根夾立蒼虬怒猶畜天險
悠悠置一身翻令萬事紛盈矚伊昔炎荒禹功外
弦木爲弓自殊俗黃屋名方誇趙佗樓船功已歸
楊僕雲帆從此走中原翠羽文犀日相屬古來健
者亦多人阻險憑危禍旋伏試看真符會有歸莫
教自赤韓彭族卽今萬里同車書洗兵南海無昏
黷翡翠烟霏碧澗陰枕榔雨暗青村曲回看閩闔
憶晨趨今日浮沉如轉燭關吏無煩問去來博羅

美酒春應熟

佛桑

南國驚看結束新
小來紅淚已沾巾
紫絲障密難藏艷
朱鳥窗深別駐春
不共銀蠶眠後果
長依金粟現前身
自憐不逐東風嫁
點臂香銷獨損神

王端州邀遊七星巖分體作并限韻

久作憑軒望欣傳
載酒過使君惜秋
爽高會此巖阿峰
勢聯珠斗林光轉
玉珂紛紛衣落翠
往往鏡浮螺洞穴
龍湫閔巖窗豹霧
多削成懸結構溟
漲接陂陀遵渚呼
輕鷁綠崖籍細莎
青松元作塵白鷺
欲裁蓑老怯花前
舞愁嫌醉後歌探
奇應未足望古意
如何

五色鸚鵡

七寶檠來別樣裝
百花深貯鬱金堂
秦娥罷卷宮衣薄
越楫羞堆繡被香
生事可能分竹實
鄉心應自託扶桑
翠衿紅味殊非伴
莫逞當筵鼓吏狂

粵臺春日雜成短句

粵王臺畔臘初殘
簇簇花枝巧耐寒
只似玉窗翻

繡譜碧桃青桂一時看

二

輕帷小轎碧油新
柳市花宮日幾巡
蟬鬢鬪簪人
勝子金花祠下祝宜春

三

花田昔日葬宮娃
一片春風十里花
借問傷心千古地
花田何似玉鈎斜

四

素馨圍髻想明姿
賸結銀燈綴折枝
日晚綠衣當市賣
玉纖穿與未薦時

五

蝶翅人傳比扇羅
春寒金繭在高柯
青陵臺畔魂銷盡
何事羅浮恨校多

六

珠江花落半川紅
海舶江帆一望中
別有春遊喧渡晚
雙鬟柔櫓駕東風

七

自收生結伴鴛鴦
生小金釵有舊鄉
底事比來人

盡識博山爭要女兒香

地名金釵惱
生最上香

八

小家碧玉破瓜年素足如霜步若烟輸與燕姬偏
自喜春風簾底繡行纏

九

相邀不待踏青游勝地香車日漸稠見說丹霞天
半起玉山東畔五層樓

十

檳榔常日進金盤會得佳人薄醉看一顆櫻桃紅

綻了便須扶上玉闌干

十一

白花林葛織來殊一匹真成重五銖割得蛟宮機

上霧至今滄海有啼珠

增城葛出
白花林

十二

木棉花發禁烟時一路朱霞映酒旗錯道春光等
閒老杜鵑啼上最高枝

十三

山木南來莫辨名榕林如幕不聞鶯移根若向山

亭左臥看濃陰過一生

十四

紫莖綠葉滿天涯唯有了蘭此最誇珍重國香相
覓贈歸來應號解元花

梁藥亭見贈了
蘭是第一種

十五

老去樊川不解狂客中誰遣到歡場風流太守閒
居日舞困織腰夜未央

十六

珍果齊傳荔子名曾承一笑在華清我來多恐成

相避到日才過去始生

十七

羚羊峽口鬪雲根鸚眼青花子細論莫訝緹封珍
似玉未央宮瓦久無存

十八

棐几新裁置筆牀烟雲差滿陸生裝不知比似誰
邢尹潑墨山頭舊點蒼

晉菴贈真上人

支遁幽栖地斜門水上開碧雲隨几杖青壁入樓

臺卽事見今古無人知去來從今浥花雨歸夢亦
徘徊

重游七星巖

不謂成淹泊星巖此再過澗添新雨足春入落花
多世事共流轉天風吹嘯歌秘書碑字在一爲拂
烟蘿

訓梁藥亭次余南歸詩韻見送之作并簡

別陳元孝屈翁山吳山帶諸子

贏得淄塵不上衣京華知舊近音希駑駘北望寧
無戀烏鵲南來已倦飛十度峽雲迷桂楫一篙江
雨別梅磯平生湖海何常在相對空驚歲月非

二

函角天涯莫漫催雄圖何處不蒿萊雨寒銅鼓聲
俱盡月落花田夢不回五色會籠鸚鵡去千金須
買荔支來春風萬事飄零甚有酒還登望漢臺

三

梁侯才思薄青旻誰謂明河自有津幾夕尊罍留
別浦明年鈴索憶歸人客懷礪礪澆應在天路風

秋九集 卷一
烟到始真買斷芝蘭湖上宅莫矜聾俗唱陽春

四

經年白社苦淹留只有朋儻意未休拙計尚荒三
徑菊羈心先上五湖舟歸携冰雪皆成賞老惜雲
山不再游肯過汲泉因駐屐修鱗應爲出艦頭

端州早秋

天南一葉客心驚病骨經年滯粵城老去歲時思
故國信來暘雨問神京飄零瓜果雙星夕消息
桂苻萬里程我待涼風好歸去柁樓吟續嶺猿聲

靈山寺夜泊期藥亭不至

危亭急峽鎖岩堯歸客懷人不自聊萬里郵程才
破處一年秋月最明宵神傷崖寺同留迹目斷江
天又落潮先後紅梅關上路燕吳回首歎分鑣

得張禮部謙菴凶問

日南邂逅酒盈觴別後傳聞足斷腸今日象犀勞
置使當年魑魅本投荒星軺豈謂君恩薄旅襯
誰憐客路長猶有平生無限意蜚烟蠻雨永相望

過清遠峽

峽雨蕭蕭啼鷓鴣一帆秋老話歸吳霜微夾岸林
猶暗水落迴汀路轉紆赤縣官曹干氣象白頭身
事付江湖獨憐鄉夢經年隔過盡雲鴻一字無

歸舟

歸覺川原好風烟此路閒微黃霜後樹殘綠燒餘
山島艇漁成市蠻村虎不閑近家唯牧豎騎犢渡
河還

二

夙心辭玉陛舊俗問珠官陵谷幾時變江山爲客
寒未須疑苾蕙猶得載芝蘭辛苦連宵月隨人宿
夜湍

曹娥廟

英德縣曹坑虞氏女黃巢之亂聚兵保城城得
不破土人祀之湏陽峽

青袍白馬暗蒼梧繡帳催傳金僕姑千隊未誇居
上騎孤城旋報遁師烏靈旗殺氣收徵側古廟濤
聲接上虞多少材官貂珥貴只教蟬鬢擅陰符

詠眼鏡

金篋何處問真源別有神明見隔垣攬鏡流光應
似夢看花心事獨無言修成桂魄三秋色剪破蛟
冰一夜痕容我醉餘青更白莫將分別望乾坤

千里鏡

接天芳草久沾巾望合層冰轉自親七夕河梁元
隔水三山宮闕本如銀重淵只怨然犀客邃古誰
爲化石人直道瑠璃成寶地人心猶自有迷津

始興道中

曲江江勢舊迴腸況復秋心對夕陽林氣帶霜猶
隱郭水痕侵岸欲平檣紅蘭解作依人笑紫桂重
飄故國香差幸此邦還有歲未勞陰雨念南荒

二

紅梅關北葉初飛九月炎方未授衣隻堠晴江無
女浣荒村獨樹有神依南來郡邑明朝盡北首風
波往事非誰向當時問金鏡中原盡日走珠璣

和潘稼堂同年南雄旅舍題壁之作

君到題詩苦計程先歸吾又宿江城卽看絕嶺穿
雲上便買扁舟載月行萬里青山俱作客十年丹

禁不成名南枝折寄同袍友去去吳閫酒價輕

橫浦曲

還舟下橫浦橫浦秋風冷水清
鑒肌骨不見去年影

二

橫浦易摧舟積石何齒齒愁到天池翻何當復留此

三

南北殊寒暖枝枝太不同君看人意隔不待最高

峰

四

紅梅亭北道欲去還成泣因夢報情人從今不相及

五

見說南中路清猿如在耳幸自不曾聞愁心已難理

六

借問來時水連天今沒鼉舩下西風銀檣槁沙

岸

七

上水日十里下水疾於箭多謝石尤風三莫南康縣

八

津頭給官役井里連桑柘東舍可憐兒知更月明下

經年

海國經年夢秋深此北來丹楓過嶺見白雁及關

迴習暖無新絮禁寒有舊醅客愁殊未已莫上鬱

孤臺

新城

江上城誰築傳言避亂兵夜譙山角斷曉堞井烟生已自無王制居然壓賊營時清人不用星散事

春耕

夢到史館

曉來夢入鸞坡路猶是常時行坐處手持一帙作者誰為摘瑕疵語其故當時並馬東華春同日承

恩五十人龍門舊格分明在就中落筆誰最親前
年狂生議輕發一編久給尚書札 聖主何曾下
詔催是非一代爭毫髮紛吾螭陛侍 龍顏 問
寢重陪博望班愧負 君恩高海嶽轉令倦羽憶
江關竭來嶺徼風花遠青史不知今早晚何意紅
梨久別人一夜春明夢中返秋衾覺後宿章江直
北雲天萬里長中酒篷牕聞落葉鬱孤臺下月如
霜

曉泊聞雨

侵曉螺川雨冥冥客最知氣涼風定後聲細月沉
時曲岸跳魚急圓沙起雁遲玉山新水足應得果
前期

曉發

授衣理歸舳歲莫不遑止水宿厭風湍倦情戀墟
里秋篷一尺外萬里岷山水北斗光闌干長年掃
霜起

山店

浪淘冬盡苦愁侵卻向山程歎滯淫白鬪衝寒風

野濶青旗沽酒雪村深江帆驛騎懸雙夢葦索桃
符感寸心歸近轉多惆悵事并來岐路一沾襟

泊嘉禾

濩落行藏苦滯淫一春風雨最侵尋屬車去憶雞
翹遠客帆來驚柳色深只謂故鄉堪送老可能時
事不關心月波樓畔令人醉芳草青青動越吟

二

知得浮生幾度春孤舟終日落花津青雲久付全
輪局丹壑聊存已退身生事白鷗差似我世情蒼

耳解欺人京華知舊無消息莫遣空沾紫陌塵

竹憶

五日

十里蒲塘簇羽旂西簾交擢浪花飛梅風著面初
兼酒麥雨如塵未濕衣過眼新妝催歲換驚心舊
侶逐時稀空餘角糴尋常設憶得天門拜賜歸

秋水集卷七終

秋水集卷第八 詩八

張見陽署中試楊子江中冷泉

我家古華山二泉出其麓不受第一名迄乃無定
屬長江萬里來茫茫失清濁安得中冷水爭長康
王谷張侯擅品藻好事破流俗山靈不敢秘呈奇
効所欲消息本自然靜言驗起伏天清江練平魚
蜃千里肅更當晝夜中先事戒輕舳圍合數頃內
傾注勞心目須臾天根翻蛟珠噴堪掬甌鬯一時
求挹取亦在速移時卽已非江濤苦底蹙提携活

火煎烹點秋茶綠評賞賴賢侯遂滿偃鼠腹吾生
泉之鄉來往此亦熟白頭始探奇往者真碌碌歸
來雙井上軍持汲寒玉無乃動靜殊退然媚幽獨
甲乙吾不知平生生意交足

金山次韻

旌旗無復照江紅一望昇平在眼中氣接斗牛天
險逼浪淘吳楚霸圖空標題 睿藻飛揚甚點注
懸崖結構工卻憶翠華東幸日山頭草木盡爭雄

焦山次韻

一峰浮起夕陽邊人道山名自孝然深樹望中常
似雨滄波盡處已無天鷗鷺白舫來何所鶴記青
山類昔年地主况欣平子在從今商略釣魚船

偶然作

一丈維摩室何妨置我曹流鶯驚客避芳草共人
高貧甚安唐嗇慵深學魯臬書臨王內史唯是乞
櫻桃

二

病裏看花落閒庭試杖藜夜塵凝鼠跡朝露在蛛

絲園籜聽時解溪魚上卻遲一番新水足正負放
船時

三

差喜過從少濡毫亦礙閒晚花難駐景片石笑移
山雨榻從渠溼風窗或自關遙知灌園叟無復夢
清班

四

酒斷非因戒詩成未得題遣時閒拾穗歷世老炊
藿有衲期蓮界無傭漑藥畦亂紅風打盡腸斷送

虞兮

麗春花今
名虞美人

歲盡

老看人事總雲烟零落朋遊倍黯然曉鏡霜華催
短景夜龕燈影伴枯禪一編閑校栽花譜十畝全
荒種秫田獨喜溫風蘇病骨不須鶴語憶堯年

二

藥裏關心歲序過又斟春酒醉紅蠶青山襍被追
遊歇紫禁濡毫往事多世態不妨訶李廣君恩
猶自問廉頗三年欹枕椒花節無復因風想玉珂

病窓口號

空庭百舌語侵晨病裏年華記未真正訝玉梅迎
臘放却教青女誤司春

冬溫梅已試蕊
立春後轉寒

二

南枝爭向嶺頭看約勒春風有画欄幸是後時方
一笑可憐玉笛未吹殘

三

碧窓花雨靜悒悒社酒龔來且自斟願得梵鐘聲
喚徹畢生長聽海潮音

四

爲有愁身是病由神方換骨杳難求拍肩若便留
真訣絳節橫飛十二樓

五

閒從物理悟歸根一樹婆娑對掩門看到彭殤皆
夢幻枉教倉扁伺晨昏

六

綠苔生榻斷逢迎今雨蕭蕭異昔情猶有貧交心
尚爾清談相過一袁生

謂朝
皆

七

鼠姑枝上正初芽莫遣栽花不見花要待小窓婪
尾候宿妝扶起看檀霞

八

冰霜擁衛苦難全又委蕉陰片石邊領取維摩真
實語了知身世本無堅

九

無端筆債鎮相催病腕從今謝不才莫笑一錢元
不直右軍方復換鵝來

十

一編血碧為知稀枉落廷評有是非我憶田橫門

下士輓歌淒斷誓同歸

讀嵇留山遺稿

聞喬石林同年被命移居京邸

聞爾移家去無因祖道傍主恩容密邇鄉夢付
蒼黃舊雨論文地春風盡室裝人生蓬梗耳莫遣
鬢成霜

得門人張公孚行取之報

張子推英絕當時屬望深五年千室寄萬里一函

心壬申秋滇函遠訊爽氣應如昨
騫飛果自今
老夫耽病在支枕起長吟

題画

層巒面面夕陽開
不著間門護綠苔
料得亭臯最
深處更無人為聽鷓來

二

新水浮村照眼明
籬根初繫釣船輕
還看牧笛橋西路
十畝溪田雜雨晴

三

馳烟從此闕雲關
別結茅齋坐看山
解道西山朝爽好
不教手版斲時閒

四

一枝筇杖恣探奇
十里烟光上顚遲
西崦人家明又滅
下方應是晚鐘時

五

清闕風流映後先
尙書逸格自天然
雲烟合散原無在
悟得先生画裏禪

董文敏有画禪小印

六

秘水集 卷八
柴門閒對玉陵嶒濁酒鄰莊喚卽磨別是人間清
絕處滿天風雪挂漁罾

序

往余解組溪干繫船湖曲見當壚之酒母甕釀百
花有題壁之詞人墨成五采則藕漁嚴子所製望
海潮一章也旣而賞寫羊孚楷羨鍾王之法因之
函開殷浩書通嵇呂之交乃嚴子謬許入林時同
籍弁身如鴻雪雖漂流略似西川契比龍雲然企
慕實踰東野顧余湖海之氣猶未除豪而子丘壑
之姿非關作達波涵千頃不濁兼之以不清幹挺
百尋若近尤能以若遠眼無清白登山獨喜看雲

口絕雌黃對客惟宜飲酒是以靜多於動實過其名王公甚重嘉賓懶於置幕天子將召供奉呼不上船良由情性使然故非矯強所致矣至於才清擬月言粲成花具庾鮑之幽思用錢劉之妙格引人著勝多濠濮間情使我猶憐是風塵外物無不仰追騷雅共振藻於葩壇并使旁及聲歌總擊香於蘭畹洞庭落木淒清葭菼之聲湘浦層波澹蕩芙蓉之影此秋水一集所由名耶嗟乎名士無多虛聲何益上林三奏惟相如能賦大人汾水一篇獨李嶠可稱才子吾不能無生瑜之歎且重有懷璧之傷也豐南同學弟吳綺書

秋水集卷第九

詞上

勾 吳

嚴

繩孫

浣溪沙

鏡裏花枝折未成
 水中蓮子動分明
 慵紅悶翠轉盈盈
 多恨崔徽渾似画
 倦遊司馬苦關情
 幾時懷抱屬卿卿

二

盡日風吹到大羅
 金堂消息見橫波
 暖雲香霧奈伊何
 猶是不曾經一笑
 問誰堪與画雙蛾
 一般

愁緒在心窩

三

窄地潛窺近西闌玉人心性得應難全身今日付
郎看倚處暗聽鶯語怯携來私訝玉纖寒莫教
人事更摧殘

四

隙影餘香望未賒爲誰惆悵似天涯紫蘭重院謝
孃家生小暈眉臨卻月近來書格愛簪花麝煤
繭紙映輕紗

五

綠擁紅遮惱暗期惠心無處不先知鳳屏東畔獨
來時忍待成烟憐紫玉敢誇能事比紅兒等閒
踪跡易猜疑

六

瘦損腰支不奈愁扇欹燈背晚庭幽不如眠去夢
溫柔昨夜涼風生玉砌舊時明月在蘭舟一生
真得幾回眸

前調

粉無端退蝶翎赤僧偷眼是蜻蜓春光先過短
長亭安得手持修月斧願將身作護花鈴不堪
風雨澹丹青

望江南

江南好蟹浦西難如春酒連船浮竹葉春廚三月
有鱖魚只合浦邊居

二

江南好一片石頭城細雨飛來磯燕小暖風扶上
紙鳶輕依約是清明

虞美人

征帆只是悠悠去去也知何處淚痕休漬別時衣
彈與烟鴻猶得向南飛月華幾夕清如洗料得
卿歸矣暗愁如霧又黃昏有箇盈盈相並說遊人

臨江仙

試問吳宮人去後綺羅多少星霜一聲漁笛散橫
塘虎丘今夜月猶爲照真娘記得霓裳花底見
春風幾度思量生公石上舊年芳夜寒蓮漏永清
影在迴廊

小重山 桂花

一夜檀心怨廣寒西風吹不盡小窗閒漢宮黃額
西來難珠簾卷惆悵夕陽山可記曉妝殘有人
親插與鬢雲彎露華依舊溼闌干何曾是寂寞淚
珠彈

一翦梅

欸抱多情訴斷腸生向愁鄉死向柔鄉鴛鴦魂夢
幾時雙月滿橫塘風滿瞿塘紅浪翻衾絮語長
贏得商量怕得思量可堪銀漢是紅牆心上檀郎

陌上蕭郎

蝶戀花

青瑣簾前人惜別未許牽衣較比牽衣切一曲陽
關初唱徹相看本是明明月宛轉征衣金粟尺
心字香溫纖手流蘇結夢裏彩雲留不得西風吹
過黃花節

前調

翠帳寒生香篆裊斜鞦腰支一向和衣抱暮雨簾
櫳如欲曉羅裙半展瀟湘繞笑吐丁香檀暈小

霧溼花房楊柳三眠了喚起鳳屏燈悄悄試看鬢影鬆多少

風入松

星移帆影月移沙秋思誰家別時不敢分明語蹙春山暗損韶華又是中秋時候西風幾陣歸鴉相思難遣夢交加水濶山斜尊前常恨天涯遠況如今真箇天涯若問重來何日待伊歸向窗紗

滿江紅

馬跡車塵甚今生還能到我更多少鴻離鶴怨浪淘風簌酒力不禁歸夢覺鬢絲都是羈愁做冷秋心梁燕北來時能傳麼窮愁恨眉峰鎖風塵淚征衫浣儘寂寥前事算來都可小句成時看墨淺新妝竟了憐花安只如今和影對新蟾人三箇

前調

別袂偷分盼不到片帆香陌正雨過亂紅飛盡水雲凝碧楊柳漫牽歌意緒苧蘿多少愁踪跡怕羈心重對舊亭臺傷今昔花影晝蟾陰夕重執手何時得奈渚蒲檣燕助人行色縱是夢來應有恨

情知留得元無益算人生雙鬢幾時青成拋擲

前調

午日

生老樊川水嬉不盡當年興問十里湖光何處画
橈相並金管風多聽又失珠簾雨細看難定算陳
思著眼不曾多驚鴻影 凭舷意應誰省拋醉纈
朱榴映儘繁華都付藕絲風領一簇愁紅空極浦
半湖柔綠浮歸艇正高樓人在柳陰中烟光暝

風中柳

黃鶯

細柳拖烟織就亂絲多少怪擲處金梭偏小一枝
飛繞數聲啼了溼新簧薄寒猶峭 嬌音斷續短
夢綠窗驚曉弄春陰翠翻紅笑曲池人悄落花風
裊又銜來一番殘照

風流子

荀郎傷逝後魂銷盡驀地見傾城正梅粉乍舒舊
家門巷柳絲斜鞦別樣才情更幾度玉釵寒撥火
銀甲夜調箏斗帳珠瑩檀心偷展鳳燈香爇花睡
難成 無端將去也人何處夢裏應喚卿卿空記
鵝兒酒煖杏子衫清怕油壁西陵雨僝風憇美人

南浦綠怨紅驚爲待蘭舟催發重聽流鶯

減字木蘭花

華燈影裏纔飲香醪吾醉矣試問梅花春在紅橋
第幾家韶光彈指欲說心情都不是目斷驚鴻
莫雨蕭蕭幾陣風

前調

春融幾日雪盡遙峰看愈碧細草東西一路晴絲
罨馬蹄青青楊柳沾酒人家猶在否楊柳青青
依舊長亭接短亭

如夢令

禁得幾多僂僂春色明朝還又待倩養花風吹展
玉人眉皺生受生受管是這回清瘦

前調

落花

魚浪飄香千點燕尾分烟一剪已自出墻來又被
輕風吹轉吹轉吹轉剛逗卷簾人面

柳梢青

曉色汀洲洩雲微度雨腳初收碧簟涼生宿醒未
解秋在蘭舟箇人何處凝眸記不起春風舊游

花外迎歸霜前教去總是輕鷗

滿庭芳

佛手柑

玉露凝香金風傳彩更誰錫與嘉名移來鹿苑相
好自天成見說漢宮仙掌輕將去鉛淚雙零算爭
似玉毫光裏一指證無生 兜羅垂引處乍伸還
屈示現分明想拈花俱笑指月同清應是散花人
至鄰虛界驀地香城慈雲護摻摻親供相對展金
經

桂枝香

胥江懷古

吳城東畔早一抹秋容驟雨初歛試問忠魂何處
依稀未遠六千君子凌波起便江頭水犀朝偃傷
心此際驚濤濺血臣言真踐 歎千古興亡滿眼
更白馬從遊此恨誰見贏得神鴉社鼓麗譙荒甸
西風誰把英雄淚灑東流一時吹轉始應消得簫
聲吳市那些幽怨

生查子

題西馬

春回紅堦看無價桃花汗重連錢卸驤首望長天
雙瞳夾鏡懸 盤渦初出浴芳草如烟綠莫但惜

障泥追風會有時

醉公子

郊外青驄馬蹀躞垂楊下
悵望碧雲重夕陽蓮葉
東 最是銷魂處
禾黍離披去遠客
易驚秋風多
莫上樓

踏莎行

月魄分橋烟鬢迷渡
分明十里長洲路
從教幽夢
解相尋亂帆影裏人何處
細藥偷黃單絹引素
去來渾是難分付
西風篷底博山香
一絲絲似秋

情緒

念奴嬌

浮生夢裏更能得幾度
人間今夕西子湖頭
秋已半清景似曾相識
銀渚雲開珠胎月滿
一片傷心碧
姮娥知否照人如此清切
試望蘇小西陵如
今松柏盡難尋
油壁星火樓臺永夜舟
不是舊游踪跡
病憶愁吟有荷花笑我
百端交集數聲何處
夜分猶自吹笛

望海潮

錢塘懷古和柳屯田

吳顛越蹶玄黃戰罷無多錢趙興亡城柝宵嚴宮
鴉曉起潮聲依舊錢塘綺麗最難忘有蜀船紅錦
粵橐沈香別樣風流翠翹金鳳內家妝 笙歌十
里湖光更沈雲菰米墜粉蓮房一道愁烟三分流
水惱人唯有斜陽盡日繞荒岡又秋營函角粉隊
軍裝指點六陵衰草下牛羊

意難忘

生小盈盈是天教斷送賦與多情密防鸚語滑愁
壓鳳牋輕紅淚溼翠眉清猶是可憐生夢兒中幾
回來處只恁分明 算來誰負流鶯有花枝照妾
明月隨卿病應前夜得眼是幾時醒欲画也恐難
成堪否與題名道判將綠消紅褪分付丹青

浣溪沙

爲漢陽李子臨姬人小影不似

一段巫雲画不成想中依約遠山青不曾真似未
傾城 錦水鴛鴦非舊曲芳洲鸚鵡太無情放郎
雙槩下金陵

瑞龍吟

李迎侍兒掃鏡於吳門

吳趨里誰在小小門庭溶溶烟水柔枝乍結春愁

盈盈才道塗妝綰髻 情難擬不比舊家桃葉綠
 陰深矣檀郎近約相迎雀釵新黛玉符空翠 休
 問石城艇子更堪腸斷竹西歌吹唯有秦娘橋邊
 離夢猶繫漢皋珮冷別是傷心地待携向蘭缸背
 底菱花偷展誰照郎心切探春試問春來未蜂子
 憐新蕊香破也報來幽窗病起吟牋賦筆待伊次
 第

南鄉子 午日

日永枕空支漫折榴花綴五絲渡口寂寥歌鼓斷
 尋思病也何曾似舊時 懶自醉芳卮剪取清光
 寫楚詞此會明年何處所差池似客心情燕子知

瑣窗寒

開到茶蘼苔荒蘚老紋紗嫌薄怎禁疎雨閒了秋
 千絨索只垂楊漸濃綠雲重陰遮斷紅樓角想鏡
 臺妝罷冷凝花影羅衣微覺 簾幙人如昨但玉
 凍釵茸粉銷梳掠錦箏彈怨又恨秦絲聲弱待拈
 針添繡文鴛晚風料峭低素萼向薰爐消受春寒
 孤負湔裙約

和九集 卷九
滿江紅

一霎燈前早硬卻心兒別了幸道是頻年浪迹慣
曾草草恰喜病隨殘月減可知夢與秋風杳只廻
廊纔轉是天涯漁陽道偷彈淚燈花小親煮藥
爐烟曉儘一番愁悴又添離抱別後廢屢炊卻盡
客中魚素愁難料竟何如雙影玉蘭堂相看老

鷓鴣天

不合尊前唱竹枝天涯贏得夢來遲鴟絃喚起三
更月一縷花風骨斷絲多少事只心知又拈紅
豆記相思而今牢落青衫淚誰似潯陽夜泊時

滿路花

與聽公

吳宮落日荒燕市悲歌暮天山三丈雪迷行路驀
然相遇寶筏橫津渡支公都未許會待安心早教
覓向何處玄關頻叩默語俱成誤白頭渾未定
風前絮一燈深照領略元無句從今應記取玉河
霜月滿身多少花雨

山花子

王西樵吏部小照

禪悅何如昔輞川前身元住散花天一幅繡窗金

粟影自年年 起草獨來清禁裏題詩多在晚山
邊依舊司勳禪榻畔落花烟

菩薩蠻

王阮亭戶部小照

濟南名士含香客蜀牋盈手桃花劈天下工爲文
紅橋舊使君 鳳城春似許梅子肥時雨借問對
題詩東風第幾枝

望江南

春欲盡昨夜西樓東暗綠撲簾銀杏雨昏黃扶袖
玉蘭風人在小窗中 山枕淚只是背人紅諱病
鏡知眉戍削關心書辨墨纖濃歸夢鎮相逢

二

臨欲別何處見迴眸一丈紅墻遮玉砌十年青鳥
斷銀鈎往事總成愁 憔悴盡花滿憶春游褰幌
月華窺擁被隔簾風影報梳頭終日並蘭舟

三

愁絕處偏是記從前鸚鵡關心留眼地薔薇垂淚
送人天腸斷竟無言 孤負了相見又依然豈有
計堪酬錦段更無人與寄瑤牋消瘦也誰憐

四

紅成陣花落麥涼秋那得鷓鴣供滌器不關楊柳
悔封侯老我是窮愁 欹枕夜幾度月當樓賦別
江淹慚夢錦寄愁徐淑阻書郵多分怨靈脩

五

清夜憶兩兩暗銷魂懷袖淚痕悲灼灼西圖身影
喚真真一種是雙文 不信是真合老風塵愁似
巴山聽夜雨懶從巫峽賦朝雲消息奈何春

六

聽宛轉愁到渡江多杏子雨餘梅子雨柳枝歌罷
竹枝歌一抹遠山螺 曾幾日輕扇掩織羅白髮
黃金雙計拙綠陰青子一春過歸去意如何

七

湖上好谷口舊相招青錦湍迴開西檻綠楊風過
響檀槽遲日醉春醪 簾影外宛轉小紅橋見按
金釵臨水裔又兜羅襪下山椒催上木蘭橈

八

溪口路歸夢繞明湖風送落紅沾網眼雨浮新綠

上城跼節物近鳧車 雲鬢畔小小赤靈符輕袖
五絲凭画鷁暗窗九子裏青菰人似舊時無

虞美人

和高澹人折花圖

韶光總被風吹去又是清明雨雨餘騎馬覓殘春
賸折一枝紅艷襯梨雲 屏山曲護檀霞重何處
江南夢起來燒燭看仍稀剪取生綃和淚画崔徽

浣溪沙

梅粉園林曉夜涼不堪終日倚樓窗落花風外更
斜陽 賸識唾花休卷袖不成心字始憐香十三

絃上怨瀟湘

七娘子

曉汲

露華桐乳垂垂滴驪風鬢十八來晨汲初景墻頭
澹搖釵色半牽玉虎全無力 新涼幾日尋刀尺
便做成出水曹衣窄裙帶頻拈襪羅愁溼苔邊定
有驚鴻跡

南浦

題朱孟辨蘆洲聚雁

生綃淡墨向人心譜出許多愁賸有垂楊金縷幾
葉下寒流隱隱漁燈生處鎖瀟湘一派荻花秋問

賓鴻點點稻梁何在生占白蘋洲 回首西風故
國有芙蓉塘外月如鉤應是千帆數盡人倚隔江
樓此際離魂歸去正誰家水調唱歌頭甚無情圖
画烟中不著一扁舟

秋水集卷九終

秋水集卷第十 詞下

燭影搖紅 上元

薄醉垂鞭寶坊才轉疑飛墜一年明月打頭圓望
處渾如水便有魚龍成隊更多少王侯邸第白頭
猶說天上霓裳舊時風味 誰耐間行紫騮可也
如人意歸來孤館踏歌聲遠聽心還碎往事姮娥
應記遍燈月闌珊影裏而今誰問南國春寒箇人
憔悴

輓轡金井 風

傷心休問只風兒也勾吹將人老剗地排空總沒
些分曉城烏去了又喚起鈿車聲早漢苑秦宮千
門萬戶飄殘多少 古今去來如鳥把狗屠駿市
往事都掃似絮羈魂怎禁他顛倒江南夢杳敢吹
徧天涯芳草故國飄零回船聽雨甚時重到

眼兒媚

詠紅姑娘

珊枕寒生夜來霜猶自可人妝絳仙
眼斜倚紗窗 傷心合是櫻桃侶零落鄭家香生
生長共故宮衰草同對斜陽

元故宮遺錄金殿前有此果

鵲橋仙

七夕雷雨

觚稜日落宮衣初卷隱隱雲駟欲駕金蛇玉虎太
顛狂誤此刻天孫無價 故園何處針樓明月依
舊一眉如画誰言客鬢久經霜似才共玉環盟罷

水龍吟

京江離席

南徐自是傷心處天水平分爪步風吹浪打英雄
去盡江山千古此際茫茫故人揮手一時燕楚喜
離尊重滿彩牋同擘邀仙令片帆駐 多少風流
雲散更東南斷魂金鼓平生知己寸心空在算來

良苦夢裏平湖芙蓉秋老使君歸去便從今擊筑
聲沈聽湘瑟兩何許

鷓鴣天

颯颯靈風不滿旗濁河東下鎮如馳荒鷄啼斷還
鄉夢一葉連天獨去時 烟漠漠雨絲絲居人相
望不相知紫萸黃菊無情甚腸斷年年贈別離

蝶戀花

依舊荷香三十里比似年時無復殘紅矣不恨紅
芳不相俟恨他零落秋如此 驚外遙山鷗外水
水上斜陽染出千峰紫脉脉秋心勾引起一行白
雁天邊字

山花子

人與青山共白頭犯寒簾控小金鈎一樹垂楊扶
不起壓春愁 眼底生涯都未是天邊凝望幾時
休索倩玉驄馱醉去病青樓

減字木蘭花

廣庭人去閣淚晴秋無一語重認行踪一片薔薇
糝徑紅 伴伊雙燕分我三春花底雁翻怕書來

又報愁蛾病不開

滿江紅

世事茫茫傷不了中年哀樂到而今未應揮手心
先作惡紫禁烏啼頻悵望青門柳色同飄泊記一
燈微雨照論心簷花落 車與笠平生諾萍將梗
重來約早魂銷何處孤城殘角客路亂餘春色在
故鄉老去歡情薄盼紫桐花底雁書來題紅藥

百字令

題震修小照次韻

夢回身世待與子呼酒細論齊物箇是文場摧敵
手所向一時堅壁白日難揮黃金易散彈指菁華
歇短衣射虎憐渠未是侯骨 我是海鳥忘機君
休自歎歸燕紅襟隻飛絮亂花渾不管零落六朝
烟月生卽同年居偏對宇老覺關情切芒屨相待
共君踏遍冰雪

前調

再和

早時人羨道不是風雨滄池中物秃袖藤鞵今似
許冷落少年油壁噩夢關心驚塵撲面此事何當
歇貧來自喜詩篇天付花骨 試問三匝何依一

身猶似烏鵲南飛隻
決眼雲烟成變幻
何況吹簫明月
唯有瞿曇殷勤一指
校與心期切
人間萬事北風應近飛雪

青玉案

虎丘山下傷心路
直不放游人去
鬢影歌聲香不度
賣花籬畔鬪茶闌
角記得停舟處
亂紅飛過真娘墓
休覓斷碑腸斷句
愁校興亡爭幾許
一龕燈影半天鈴
語幾陣吳宮雨

沁園春

北征次留仙江陵見寄原韻

十載行藏幾度相看
郵亭一燈任迷離
纈眼非花非霧
橫斜世路爲谷爲陵
湘珮徒捐郢歌誰和看
到無心似未曾歸來
好過琵琶江浦也
溼吳綾蛾眉淡後
誰憎只倦翮追飛
感倍增向韶年青鬢
都添縞雪春風紫陌
幾踐玄冰去就難同
平生可念要路由人
袞袞登吾休矣有茶烟
禪榻片石疎籐

御街行 中秋

算來不似蕭蕭雨
有箇安愁處
而今把酒問姮娥

是甚廣寒心緒隻輪飛上天街似水不管人羈旅
霓裳罷按當時譜一片青砧路西風白騎幾人
歸腸斷綠窗兒女數聲角罷樓船月偃雁落瀟湘
去

菩薩蠻 託興

昭陽一夜思傾國家家鸞鏡新妝色狼籍面雙蛾
手繁宮樣多不須矜艷冶明日承恩者淡掃便
朝天路人知可憐

二

君恩自古如流水梨園又選良家子都作六宮愁
傳言放杜秋傾城爭一顧那用論縑素幾箇定
橫陳丹青不誤人

三

唾華零落昏殘繡只將匹帛誇長袖舞罷泣春風
歸來自洗紅一時齊望幸白髮偏多恨雲雨弔
荒臺猶將夢裏來

四

金釵鈿合知何許綠章紅淚辭偏苦豈必九重知

傳看出衆時 可憐心獨矢 自銜誰家子 齟齬復
啼妝折腰伊太狂

倦尋芳

送成容若

扈從北行

鳳城東去一片斜陽千里紅
葉便不淒涼早是淒涼時節
雲驄漸拋珠汗漬桃花鞭影
明滅笑回頭有蒲萄酒煖當
壚如月算此去金波正滿何
處關山玉笛吹裂古鎮黃花
看卽滿頭須折扈蹕長楊人
自好翠帷未慣傷離別只歸
來古奚囊儘添冰雪

南鄉子

再送容若

歸語太匆匆剛道看山落葉中
生把馬蹄都襯著猩紅應到
重來更幾重今古望長空明月
山前月似弓澆酒長城飲馬窟
英雄輸與儒生罵祖龍

前調

擣衣

霜葉滿城頭一片青砧萬古愁
唯有啼痕點點在衣襟
夜夜隨君宿戍樓誤妾定吳鉤
不是蕭郎愛遠遊條脫旋寬雙
杵重封侯消得金堂幾度秋

金縷曲

題陳其年小照填詞圖有姬人吹玉簫倚曲

燕市悲歌者論從來英雄兒女漫爭聲價腸斷斑
騅人欲去剛道小喬初嫁只半幅春風圖画唱到
天涯芳草句看一聲離鳳嬌鬟亞紅淚泣數行下
浮名自是誰真假甚于思花間蘭畹一時方駕
不管秦娥簫咽後又是茶蘼開罷更何處垂楊繫
馬便遣玉人嗔急性背華燈扣損裙兒砑須罰爾
盡三雅

摸魚兒

壽留仙

似仙源桃花零亂武陵一權重駐玉堂鈴索花韉

日舊是先生游處愁如絮消受盡五湖烟月三湘
雨君恩再許教領袖詞流雙椽燭底灑翰繼遷
固喜不改張緒當年風度柳弧依舊懸戶交疏
月轉傳籌飲墜遍玉河紅露支機浦早看取七香
車上山眉嫵離情休訴只此恨重償雙紋篋展肯
放早朝去

一斛珠

鷹

雲羅萬里側目烟霄何處是自看六翮今如此華
絆朱纓擎出人兒喜奚騎紫髯探雀餒平蕪灑

秘水集 卷一
血徒爲爾微軀誓擬酬君子一夜西風夢落鍾山
裏

金縷曲

贈西溟次容若韻

畫角三聲咽倩星前梵鐘敲破三生慧業身後虛
名當日酒未勾消磨才傑君莫歎蘭摧玉折多少
青蠅相弔罷鮑家詩碧澗秋墳血聽鬼唱幾時徹
更誰炙手真堪熱只些兒翻雲覆雨移根換葉
我是漆園工隱几也任人猜蝴蝶憑寄語四明狂
客爛醉綠槐雙影畔照傷心一片琳宮月歸夢冷

逐迴雪

前調

送西溟奔母喪南歸次韻

此恨何當住也須知王和生死總成離阻真使通
都聞慟哭廢盡蓼莪詩句算母子尋常歡聚秔稻
登場春韭綠便休論萬里封侯去須富貴竟何許
片帆觸處成悲緒問從今檣烏埃燕幾番風雨
不爾置君天祿閣未算人生奇遇甚一種世間兒
女畫荻教成羞半豹早高堂鸞誥偏無負天可問
倘相語

青玉案 雁字

丹青画出秋容好看題處當殘照一一銀鈎天外
小晚妝樓上麝煤臨就忒也疎斜了 浣花波影
明如掃弟子新傳王逸少雨打風吹幾回老斷行
殘墨被誰偷譜排點銀筆巧

臨江仙 寒柳

無多烟雨旗亭路爲誰縈損風流新來消盡兩眉
愁不知當日意生怨隔紅樓 桃葉桃根同悵望
知他何處維舟玉鈎斜畔女墻頭昏鴉栖不定霜

月滿揚州

一叢花 並蒂蓮

画橈昨夜過橫塘兩兩見紅妝絲牽心苦渾閒事
甚亭亭別是難忘澹月層城影娥池館生小怕淒
涼 而今稽首祝空王便落也雙雙露寒烟遠知
何處安紅衣忽認餘香那夜簾櫳雙紋繡帖有爾
伴鴛鴦

留春令

萬山中劃長虹飲處神州東屬誰遣青青古猶今

秋入集 卷十
賦亭
嗟不盡風塵目 堪否築臺當一曲看秋容濃綠
往事山僧莫重陳待醉了供歌哭

臺城路

蕭后妝樓

憑君莫問妝樓處御溝烟水如舊滿目江山古而
無死此日定應誰有烏栖鹿走只一段鉛華芳名
未朽直道忘情試來此地斷腸否 春風何限當
日下簾聲一派遠山青後鳳脰燈昏龍香撥煖消
得宿妝殘酒寂寥清漏早一曲迴心幾時重奏付
與昏鴉夜寒喧禁柳

霜葉飛

故鄉他日丹楓路草堂斜轉山麓繞籬清澗斷橋
東盡日汲寒玉正欹枕矮窗晴旭山厨掃葉晨炊
熟醉卯酒如泥把插架陳編卷了不遣侵目 豈
少擯落江山蘆人漁子容易伴我幽獨爲探梅信
愛衝風挂蒲帆十幅要游倦歸來新浴樵青扶醉
移紅燭待先生如此去四十三年問他陵谷

南鄉子

烟月滿漁村一道飛書下九闈 聖主臨軒初試

日逡巡白髮青衫謁 至尊 隱矣又焉文歸去
空留土木身何意片詞親簡自楓宸九死從今總
負恩

小桃紅

汪蛟門禮部小照三好圖

一曲山香舞門外桃花雨清醪浮來玉山頽了十
眉愁嫵最欺人還道有心情覓羽陵殘蠹 醒眼
今何許十丈東華土偏只贏他一編陳墨商量今
古更何年二十四橋邊問吹簫人處

齊天樂

昇平嘉宴記恩

春來罷習昆明戰甲兵洱海初洗翠壘堯奠青眠
漢柳魚鑰千門宵啟爐薰鵲尾裊火鳳流蘇燭龍
垂地夢入鈞天始知身是玉皇吏 宸游此時最
喜勅雲韶屢舞鶴羽交醉百和香濃三光酒滿拜
手逡巡還起昇平樂事許 殿上賡歌栢梁新製
帶月歸遲六街平似水

南浦

送高澹人

扈從東巡

披香侍從鎮朝隨宮漏莫宮鴉忽報翠華春豫紫
塞度銀沙千里旌旗篲野簇雞翹五色亂晴霞趁

六龍飛處極天紅
雨江水泛松花
纔是鳳城三
五共華燈明月醉
皇家此際長楊羽獵獨自騁
妍華行矣青門鞭影度
關山新柳萬行遮
待歸來
又早堦翻紅藥
夢天涯

金縷曲

澹人江村圖

秋色縈懷抱
正緘來房山新繪
江村縹渺
甲帳前頭供奉客
盡日親承
天笑算縱有長林豐草
除是功成頭并白
賜明湖一曲容歸老
見與計笑君早
綠楊踈地平橋小
問丹青楓江轉處
阿誰歸棹
萬事後人吾分定
此計合教先了
待重見濁醪相勞
七十二峰湖上路
隔姚江烟雨無多少
眼底事海鷗鳥

喝馬一枝花

送沈融谷

綠鬢銅章吏籍甚
東陽才子柘西傳
樂府滿燕市
合喚羅裙鵝管調
銀字忽漫牽絲去
亂水荒山迢迢
六七千里
木柵濃陰底
清簟疎簾廳事憑
題翡翠硯白籐紙
酒伴無人蠻椀誰
同醉
記取雙江外
第一是梅邊
莫忘小驛花使

臺城路

送李分虎

秋來已是驚搖落西風更催嘶騎鯉淀通波魚山
斷壁行盡燕齊千里涼雲雁底盼楚尾吳頭一痕
江水挂片輕帆鱸香斜日小亭子溪堂樹根竹
裏惹鄰翁相報寒犬迎吠白酒黃雞芋魁菱角樂
事人生有幾鄉心頓起也擬向春前便營歸計並
著蘭舟醉吟同短李

水龍吟

端州五日

惱人細柳新蒲三年已掃金臺跡繁臺塵土鈎臺
烟雨崧臺風日淹冉年華禁他揉弄這般狼籍算
上林龍舸掣標來天笑處誰簪筆一片牂牁
風急便歸夢怎教歸得清尊空滿朱顏難駐浮名
何益多少當年玉符綵縷目胎心擲正西船迴處
金波十頃一聲山笛

菩薩蠻

題喬無功萬書圍小照

湘簾斐几浮新綠香緘燕尾同心束舒卷不曾閒
名山咫尺間好添圖外意新樣元和字迴筆画
雙蛾春風樂事多

圖書



